



Aasiaat 5. juli 2016

Inatsisartut suleriaasianni § 37 naapertorlugu Naalakkersuisunut imaattunik apeqqute-qarpunga:

### **Apeqqut:**

- 1. Isumaginninnikkut siunnersortit – socialrådgiverit perorsaanermillu suliaqartut aningaasarsiaat pillugit qanga kingullermik kattuffik namminersornerullutillu oqartussat akornanni isumaqatigiinniartoqarpa?**
  - a. Isumaqatigiinniarneq kingulleq qanoq inerreqarpa? Atorfiit qulaani pineqartut qassi %-mik akissarsiaat qaffaavigineqarpat?
- 2. Isumaginninnikkut siunnersortit – socialrådgiverit perorsaanermillu suliaqartut akissarsiaatigut qaffaavigineqassagaluarpata, nunatta karsianut qanoq naleqassava? Ulloq unnuarlu sulliviusuni aammalu kommunip iluani isumaginnittoqarfanni sulisartuni.**
  - a. 3 %-mik qaffavigineqassappata?
  - b. 5 %-mik qaffaavigineqassappata?
  - c. 7 %-mik qaffaavigineqassappata?
  - d. 10 %-mik qaffaavigineqassappata?
- 3. Isumaginninnikkut siunnersortit – socialrådgiverit perorsaanermillu suliaqartut nalinginnaasumik qaammammut qanoq akissarsiaqartinneqarpat?**
  - a. Kommunimi isumaginnittoqarfimmi siunnersorti?
  - b. Ulloq unnuarlu sulliviusuni siunnersorti?
- 4. Isumaginninnikkut siunnersortit – socialrådgiverit perorsaanermillu suliaqartut akissarsiaatigut qaffaavigineqassagaluarpata, qaammammut qanoq aningaasarsiaqalissagaluarpat? Ulloq unnuarlu sulliviusuni aammalu kommunip iluani isumaginnittoqarfanni sulisartuni.**
  - e. 3 %-mik qaffavigineqassappata?
  - f. 5 %-mik qaffaavigineqassappata?
  - g. 7 %-mik qaffaavigineqassappata?
  - h. 10 %-mik qaffaavigineqassappata?
- 5. Isumaginninnikkut siunnersortit – socialrådgiverit kommuneqarfanni isumaginninnerup iluani suliarisartagaannik (sagsbehandlerit) qummut amerlanerpaaffiliisinnaanermik Naalakkersuisuninngaaniit pilersaaruteqarpat?**
- 6. Isumaginninnikkut siunnersortit – socialrådgiverit kommuneqarfanni isumaginninnerup iluani suliarisartagaannik (sagsbehandlerit) qummut amerlanerpaaffiliisoqassagaluarpat ajornatorsiutaasinnaasutut suut Naalakkersuisuninngaaniit naatsersuutigineqarsinnaappat?**
  - a. Ajornatorsiutaasinnaasutut naatsersuutigineqartut pillugit taava Naalakkersuisut qanoq aaqqiissuteqarsinnaaneq takorloorsinnaavaat?

(Inatsisartuni ilaasortaq Peter Olsen, Inuit Ataqatigiit)

## **Tunngavilersuut:**

Naluneqanngitsutut piffisami kingullermi Qaasuitsup Kommuniani aamma Kommuneqarfik Sermersuumi meeqqat sumiginnagaasimasut amerlavallaalersimanagerat tusagassiutigut saqqumingaatsialersimavoq.

Meeqqat illersuisuat Qaasuitsumi angalasimanerminiit nalunaarusiorsimavoq, tassanilu oqariatuut ersarippoq; meeqqat sumiginnakkat amerlavallaqaat, meeqqat angajoqqaallu sullinneqarnissaminnik pisariaqartitsisut amerlavallaqaat, isumaginninnerup iluani sullississut ikippallaarput aamma ulapippallaarujussuarput, suliaminniillu angummassinnaanngillat.

Aamma taamatorluinnaqqissaq qanittukkut Sermersuup Kommuneani nunatta kangia eqqarsaatigissagaanni oqariatuut allaanerunngilluinnarpoq.

Minnerunngitsumik Kommune Kujallermi aammattaaq qanittukkut nakkutilliisunit pissutsit naammaginangilluinnartut oqariatuutigineqarput.

Naatsumik oqaatigalugu; kommuneqarfinni tamani meeqqanik sumiginnaaneq, sullissisussaaleqineq, isumaginninnikkullu siunnersuutivut ulapippallaarujussuarnerat angummassinnaanngitsullu nakkutilliisunit meeqqallu illersuisuanniit oqariatuutigineqartualersimavoq.

Allaat oqariatuutigineqartalersimalluni isumaginninnikkut siunnersortivut ilinniakkaminnik suliaqaratik suliffinni allani sulinissartik soqutiginerulersimagaat, akissarsiatit annikippallaaqimmata suliffimminnilu atugassaritinneqartut pitsaanngippallaaqimmata.

Pissutsit taamaattut akuerineqarsinnaanngillat; meerartavut taakkunanngalu sullissisugut pitsaanerusemik atugassaqartinneqartariaqarput.

Kissaatigaaralu apeqqutima ullut qulit iluanni akineqassasoq.